

L sostegn a la mendranzes vèrda a la televijion

La PAT sostegn l'ativazion del nef canal de la mendranzes de TCA e l'slariament de TRAIL sun dut l'tegnir provinzièl travers na convenzion con la RAI



La conferenza de la mendranzes tegnuda te la senta de l'Istitut Cimbri a Luserna.

Mendranzes - L'é stat la comunicazion tel lengaz de mendranza la protagonista de la XVI Conferenza de la mendranzes de la Provincia de Trent, metuda a jir en mèrtesc prum de dezember a Luserna.

Jà da n trat de temp la Provincia de Trent à defat recognosciù l'importanza strategica de l'informazion e di mass media per l'stravardament e l'svilup di lengac de mendranza, dajan n bon sostegn a la stampa ladina, mochena e cimbra e ades, con l'avent del digitèl terester, se à avert na sajon neva e de gran potenzialità ence te la comunicazion televisiva.

L digitèl terester: na gran ocazion per tropes

Fazile sion jà duc sion béleche ègres de sentir rejonèr sun ogni canal televisif de chest "passage storic" al digitèl terester. Segur se trata de n gran mudament, che met dant ocajions (e problemes) desferenc: per la jent te sia majon se à tratà e se trata più che auter de se enjignèr l'decoder o la televijion neva che la l'jà dàite, e de chierir de se troèr fora i canai che man a man se enjigna al nef sistem. Ma vardan la robes da etres ponc de veduda, l'avent del digitèl à portà ben segur mudamenc e ocajions da no se lascèr sciampèr per i patrons de emitentes televisives e ence per la mendranzes. Chest ajache l'numer di canai a la leta pel con chest sistem vegnir smaorà de amàncol 4 outes. No jon chiò a veder a fon la implicazioni politiches e economiches de chest sistem, ma se limiton a veder vèlch una de la consequenzes che chest à portà e pel portèr te noscia region e soraldut per la mendranzes.

TML: na televijion de la mendranzes linguistiches regionèles

De chest nef sistem à sapù se n imprevaler sobito la emitenta regionèla TCA che, tolan sù al sgol na idea che jà s'irèa anter i operadores de la comunicazion vejins a la mendranzes, la se à proponet de meter sù n canal resservà apontin a la mendranzes linguistiches, TML, corian l'cost de difuzion col didament de la Provincia de Trent.

Operazion de chesta sort les é de segur de gran emportanza per la cognoscentza, l'svilup e l'prestije

de la comunanzes de mendranza e de sie lengaz, ma les comporta se sà ben ence de bona gran speises, donca ge vel vardèr de stèr ascorc che chel che vegn fat sie dassen de ütöl per la comunanzes ladina, mochena e cimbra. Chest conzet vegn portà dant da n pez dai componenc de la mendranzes delaite de la Conferenza, acioche la mendranzes e i scioldi che la istituzions publiche met a la leta de sie stravardament no vegne desfrutà da zachei che podessa troèr sostegn ence utrò.

Per chest la Conferenza de la Mendranzes à metù sù n grop de lurier che te chisc meis passé à vardà de meter jù avisa finalitèdes, obietives e contegnui del nef canal de la mendranzes TML, e se sà ben ence de la ressorsces che ge vel per empieir la programazion de chest canal, a na vida che l'arsegure la doura di lengac de mendranza, e che l' sie percacent e atratif tant delaite da la comunanzes enstesses che per chi che vèrda l' canal dal de fora per les cognoscer miec.

Per l' meis de jené TML pearà via con la neva programazion

N'outa fissé i criteries condividui e metù sù n comitat de redazion (con n raprezentant per vigniuna de la trei mendranzes sul tegnir de la PAT e un de TCA) che dezide che sort de programes che cognessa jir fora e con che oraries, la mendranzes cogn ades vardèr de meter ensem a materièi video, tant de informazion che de cultura, spettacol e entrategniment, per poder ge sporjer a la jent n canal più che l'è meso rich e enteressant, ence travers la colaborazion anter la mendranzes, tant delaite de la region che con cheles più dalonc. Se sà che dut chest no pel vegnir fat da n di a l'auter. Per chest endèna TCA mana fora te chest canal veies

programes (per talian) che revèrda i raions de mendranza, ma se peissa che per l' meis de jené se posse peèr via con la neva programazion che vegnarà metuda ensem, per chel che vèrda i ladins, con materièi metui a la leta con la colaborazion del Comprenjorie, de l'Istitut Cultural Ladin, de Ercamedia, de la Scola de Fascia e de l'Union di Ladins. Te TML ge vegn dat lèrga ence ai ladins de Gherdena e Badia, endèna col TG ladin che jà vegn dat fora col sostegn de la Region, e la prejenza podarà se smaorèr co la colaborazion de istituzions e enc de la valèdes ladines de la provincia de Busan.

Na convenzion anter PAT e RAI per fèr ruèr TRAIL te dut l' Trentin

Apede a l'ativazion del nef canal digitèl, la Provincia de Trent se à avità ence de n auter vers, per responder a na domana che vegnia portà dant da n pez dai ladins: chela che la programazion del Sender Bozen vegne slarièda fora sun dut l' tegnir de la provincia, soraldut per ge permetter a duc i ladins che stèsc tel Trentin e ence ai trentins enstesc de veder l' tg ladin TRAIL.

La Conferenza de la mendranzes en mèrtesc à aproà la proponeta de convenzion anter la PAT e la RAI: con l'an 2010 e ensin al 2014 la Provincia ge darà a la RAI la soma de 200.000 euro a l'an, e chesta se empegna a dèr fora i programes per todesch e ladin de la Senta regionèla de Busan ence te dut l' Trentin.

Te sia sentèda la Conferenza de la mendranzes à ence aproà dut l' program de intervenc per l'informazion ti lengac de mendranza e la spartijon del fondo provinzièl per la mendranzes per i trei egn 2010-2012.

Lucia Gross

